

# CUSSEGL GROND

Sessiun da favrer 2023

## Dumonda Loepfe concernent l'applicaziun dal criteri «raritad» tar la realisaziun da la CIMFS

La Cunvegna interchantunala davart la medischina fermamain spezialisada (CIMFS) è la basa legala per il relasch da la glista dals ospitals da la medischina fermamain spezialisada (MFS) e fixescha ils process da decisiun dals organs da la CIMFS. Ultra da quai definescha ella ils criteris ch'in sector da prestaziun sto ademplir per valair sco MFS en il senn da la CIMFS. Tut ils 26 chantuns fan part da la CIMFS ed èn uschia s'obligads da planisar cuminaivlamain en quest sector.

Ils secturs da prestaziun ch'èn attribuids a la MFS èn privads da la planisaziun dals ospitals dals chantuns. L'attribuziun d'in sector da prestaziun da la MFS premetta, che l'intervenziun medicala è rara (art. 1 al. 1 CIMFS). La radunanza plenara da la Conferenza svizra da las directuras e dals directurs chantunals da sanadad (CDS) dals 14 da mars 2008 ha fixà la limita critica per malsognas raras a main che 1 fin 5 tractaments per mais (per exempel: transplantaziuns dal cor tar main che 12 pazients per onn).

Sin la dumonda Caduff concernent la realisaziun da la CIMFS ha la Regenza explitgà en sia resposta dals 23 d'avust 2013, ch'ella na saja per gronda part betg perencletga cun il proceder da l'organ spezialisà e da l'organ da decisiun da la CIMFS. I vegnian attribuids a la medischina fermamain spezialisada pli e pli prestaziuns e secturs, nua ch'ils criteris fixads en la cunvegna da l'attribuziun a la medischina fermamain spezialisada – en spezial il criteri da la raritad dals cas – n'existian ord vista objectiva betg u mo en moda limitada.

En connex cun l'attribuziun da prestaziuns a la MFS constateschan las deputadas ed ils deputads sutsegnads, ch'il criteri «raritad» na vegn vinavant betg resguardà u mo insufficientamain. Pli e pli vegnan prestaziuns cun adina pli auts dumbers da cas attribuids a la MFS. Il pli nov exempel è l'attribuziun da la tgira intensiva da naschientschas prematuras u a termin (3600 cas per onn) en il sector da la pediatria. Quai avess per consequenza che tractaments che vegnan fatgs oz – u eventualmain er novs – na pudessan en l'avegnir betg pli vegnir purschids en il chantun Grischun. Ins pudess numnar qua blers auters exempels. Il providiment vast e damanaivel dal lieu da domicil da la populaziun dal Grischun, sco er da regiuns vischinas sco per exempel la regiun da Sargans, ed er da numerus giasts, vegn uschia periclità essenzialmain.

Las deputadas ed ils deputads sutsegnads tschantan en quest connex perquai las suandantas dumondas a la Regenza:

1. En vista a la segirezza dal providiment: Co giuditgescha la Regenza il svilup en connex cun l'attribuziun da prestaziuns e secturs a la medischina fermamain spezialisada?
2. Tge fa la Regenza – eventualmain ensemen cun auters chantuns – per pudair cuntanscher che l'organ da decisiun applitgeschia il criteri da «raritad», uschia sco quai ch'igl era vegnì empermess, respectivamain garanti als chantuns en il rom da la procedura da participaziun, e che la segirezza dal providiment en tut las parts dal pajais stettia puspè en il center?
3. Sche l'organ da decisiun insista sin sia pratica d'interpretaziun extensiva dal criteri «raritad» e na vul betg relaschar prestaziuns cun gronds dumbers da cas or da l'attribuziun a la medischina fermamain spezialisada: Fiss la Regenza pronta da sortir da la CIMFS e tge consequenzas avess ina sortida dal Grischun ord vista da la Regenza?

Cuira, ils 15 da favrer 2023

**Loepfe**, Cahenzli-Philipp (Vaz Sut), Natter, Altmann, Bachmann, Bardill, Baselgia, Beeli, Bergamin, Berther, Biert, Binkert, Bischof, Bisculm Jörg, Bleuler-Jenny, Brandenburger, Brunold, Censi, Collenberg, Crameri, Degiacomi, Derungs, Dietrich, Epp, Favre Accola, Feuerstein, Föhn, Furger, Gansner, Gartmann-Albin, Grass, Haltiner, Heini, Hoch, Hofmann, Hohl, Holzinger-Loretz, Kasper, Kienz, Kohler, Kreiliger, Lamprecht, Maissen, Mani, Messmer-Blumer, Michael (Donat), Nicolay, Oesch, Pajic, Rageth, Rettich, Righetti, Rutishauser, Saratz Cazin, Sax, Schneider, Spagnolatti, Stiffler, Tanner, Thür-Suter, Tomaschett, Ulber, von Ballmoos, von Tscharnher, Walser, Wieland, Zanetti (Sent), Zaugg-Ettlin